



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 10 Yangia anidakangma : Tir Yimiyim tiryimiyim@aolima tir yimiyim TAPAK 7

Tokyo Olympics nung
Angelique Kerber masayatsü

Sedition ozüng anema SC oben-
dang pelaa agizüker: Rahul Gandhi

VOL. XVIII NO. 272 (ADOK 272) DIMAPUR ROGONÜ (FRIDAY) CHITENI (JULY) 16, 2021 ₹ 5.00

Dimapur Airport telongtet nung RPA amshitsü memelar

Dimapur, Chiteni/July 15 (TYO): 2018 küm August 27 nü sangdongba dak ajemdaker Civil Aviation Requirement, Section 3 - Air Transport, Series X Part 1 Issue 1 kübok Dimapur Airport telongtet km 3 tashi nung Remotely Piloted Aircraft (RPA) (Drones, Unmanned Aerial Vehicle (UAV) etc.) meymzükdaksütsü atema tetuyuba agütsüogo.

Iba tetuyuba sülen

manidakertem, Directorate General of Civil Aviation (DGCA)-i tuyuba ama RPA indang UIN/ UAOP suspend/ Cancel sütsütsü aser Indian Penal code section balala, Aircraft Act 1934, aser Aircraft Rules 1937 mesera tanga temzüng ozüng tapet dak ajemdaker merenshitsu, ta Commissioner of Police & Chairman Aerodrome Committee Dimapur, Nagaland Rothihu Tetseo, IPS-i sangdong ka ajanga metetdaksü.

4-lane contract nungi GPL anentsüba pelar: Kronu

Kohima, Chiteni/July 15 (TYO): Kohima-Dimapur 4-lane lenmang yangluba nungi NHIDCL ajanga Gayatri Projects Ltd. (GPL) anentsüba atema Minister, Planning & Coordination, Land Revenue and Parliamentary Affairs, Neiba Kronu ajanga pelaba lemsatepa liasü.

NHIDCL ajanga mapang shidak nung sen crore 340 jenjang Kohima-Dimapur 4-lane lenmang yangluba nungi GPL EPC (Engineering, Procurement and Construction) Mode anentsütsü telemtetba agiba atema pela agizüker aser tenüngsang agütsür, ta Kronu-i sangdong ka nung ashi.

Contract anentsüba anema GPL ajanga Gauhati High Court, Kohima Bench nung Writ Petition benokba

agientsütsü obendang agütsüba atema Minister-i tenüngsang agütsü.

"Iba ya ajanga nüburtemi obendanga nung tamang katetba tali akangshitsu," ta pai ashi.

Contractor temi khuret mabenba ajanga nüburtem lenmang aisü nung peria timtemogo, aser NHIDCL aser Gauhati High Court, Kohima Bench ajanga iba ama telemtetba agiba asoshi Nagaland nung aliba nüburtemi tenüngsang agütsütsü mapang lir, ta Kronu-i ashi.

Tarutsü jenjang tajungba kumdaksütsü atema corporation aser court ajanga iba ama telemtetba agiba atema lokti tentet ajunga lungjemer tenüngsang agütsütsü langa lir, ta Minister Kronu-isa ashi.

Sorkari mera tapet agia nüburtem timtem nungi anitetsüla: NPF Phek

Dimapur, Chiteni/July 15 (TYO): July 14 nü Phek jila nung NPF Phek Division consultative senden ka menogo. Senden nung, Covid-19 wara atema GOI-i senotsü teyari agütsübatem intokba indang ochishia lemsatepsü atema NPF party-i akhangba PDA sorkari süoki ia magiba atema tezü danga bilema lemsatepa liasü.

NPF Phek Division-isa, PDA sorkar dang district nung medical tenüngdakbatem aser talisa doctor, nurse aser medical osettsüt balala agi anüngba bentettsü atema tanga tang jenjang tapet agitsü, aser mongintem kari tekümdangtsü metetdaksüba dak ajemdaker Covid-19 wave tasembuba atema takaratiba nung sentong tapet yanglua atatsü takhangba agütsüogo.

Maneni NPF party-i state nung totzü jenjang tali ajungketba ashishio, koba ajanga nüburtem timtemeper, kechiyong totzü jenjang tali ajungketba ajanga tenüngdakba osettsüt balala nunga jenjang tali akümer. Kasa mapang nung PDA sorkari osettsüt nung jenjang tali akümba mazuikteter aser state mokdanga aliba maongka agia shishilembartem kar kanga ajanzüker. Anungji sorkari jenjang tapet agia nüburtem timtem nungi anitetsüla, ta kasa sangdong ajanga metetdaksü. 14.07.2021 nü tashi nung Phek

District nung totzü jenjang:

Location Petrol Diesel

1 Phek 101.24 p 95.26p
2 Meluri 105.86 94.80P
3 Chozuba 104.80 93.00P

Kasa mapang nung state nung tzunglu maruba ajanga district nung aluyimertem aika dak kanga mejungi kongshio, shirnok alu nungi züsentetba dak dang metaloker alir aser mongpu majungba ajanga parnok tzülu junga miyimteter aser tanga aluyimba maparentem takok ngua minyakteter. Anungji, sorkari state nung aliba aluyimertem atema aria bilema lira mongpu majungba ajanga tamajungtuba kongshir aliba tesemtem nem tenüngdakba teyari agütsütsü nungdaker, ta party-isa ashi.

NPF Phek Division-i, district nung 2-lane lenmang ana yanglutsü atema senotsü agütsüba asoshi GOI dang kanga pelaba lemsatepa den maparen benoka inyakba agency; NHIDCL dang inyakim kanga junga asadanga atatsü mepeshi, ajita asünung dang lenmang ya mapang shidak nung taginüba ama yanglutettsü, ta ashi. Division-isa nüburtem dang tetsükdaksü kecha meli maparen tembanga inyaktettsü atema Contractor tem den teka amteper inyakttsü mepeshia metetdaksüogo, ta NPF Phek Division tir Wepe Mekrisuh aser General Secretary Kuvera Nakro nati sangdong ka ajanga metetdaksü.

Nagaland COVID-19: Taneptsü angur nisung 24,000 jungogo

Kohima, Chiteni/July 15 (TYO): Nagaland nung Brehostibarnü nisung tasen 132 dak COVID-19 tashidak puteta state nung iba tashidak pokloker tang tashinung iba tashidak agi meneper nisung 26,381 alitsü aser kasa mapang taneptsü angur nisung 24,000 alemogo, ta health ketdangsur kati ashi.

"Tanü state nung nisung tasen 132 dak COVID-19 positive putet aser parnokji Kohima nungi nisung 72, Mokokchung nungi nisung 26, Dimapur nung 18, Kiphire nung nisung tenet, Tuensang nung nisung pezü, Longleng aser Peren nung nisung ana-na aser Wokha nung nisung ka alitsü," ta State Nodal Officer for Integrated Disease Surveillance Project, Dr Nyanthung Kikon ajanga anogoshi sandongba COVID-19 bulletin nung metetdaksü.

Kasa anogo nisung 97 taneptsü nguogo, aser itemji Dimapur aser Mokokchung district shiani nisung 28, Kohima nung 13, Mon nung 11, Zunhebton nung 9, Phek nung pezü, Peren nung aser Longleng nung ka alitsü, aser tang tashi nung

iba tashidak nungi state nung taneptsü angur ajak agi nisung 24,084 alitsü, ta pai ashi.

State nung taneptsü anguba ya Bodhbarnü shilem 91.38 liasü aser Brehostibarnü shilem 91.29 liasü.

Tang iba tashidak agi menepa alir nisung 1,050 nungi nisung 144 dak COVID-19 agi timtem sümia agütsür, nisung 19 tera timtema oxygen nung lir, nisung 22 kanga timtema oxygen nung lir, nisung 10 kangasa mejungi timtema ICU nung ventilator maden lir aser nisung ti ventilator nung lir. Nisung 797 dak iba tashidak agi timtem agütsüba mali, ta pai ashi.

Brehostibarnü state nung COVID-19 tashidak ajanga asüba nisung kata meliasü, anungji tang state nung iba tashidak keter asür nisung 516 alitsü, aser yangji nisung 14 bo danga tashidak agi asüba lir, ta Dr Kikon-i ashi.

COVID-19 tashidak agi meneper nisung 731 bo danga state balalai ogo, ta paisa ashi.

Nagaland nung tang tashinung COVID-19 tashidak alitsü südi ta temolung melemteti sample 2,42,429

tendangogo aser item ya RT-PCR ajanga sample 1,00,059 tendang, TrueNat ajanga sample 64,544 tendang aser Rapid Antigen Test ajanga sample 77,826 tendanga lir, ta paisa ashi.

State nung Bodhbarnü tashinung nisung 5,33,598 nem COVID-19 mozü doses 6,41,024 agütsüogo, ta State Immunization Officer, Dr Ritu Thuri ashi.

State nung COVID-19 mozü agütsür alirtem ya frontline nung inyaker nisung 60,385 alitsü, healthcare nung inyaker nisung 15,868 alitsü, arishi küm 45 nungi tema nisung 1,67,929 aser arishi küm 18 nungi 44 tsüngta alir nisung 2,89,416 alitsü, ta pai ashi.

Nisung 1,07,426 nem COVID-19 mozü dose tanabuba agüja parnok vaccination course junga tembangogo. Parnokya frontline nung inyaker nisung 33,845, healthcare nung inyaker nisung 11,412, arishi küm 45 nungi tema nisung 62,026 aser arishi küm 18 nungi 44 tsüngta nisung 143 alitsü, ta Dr Thuri-isa ashi.

Nagaland-Assam arrtsü atem sorkar tebilemba nübur nem metetdakang: RPP

Dimapur, Chiteni/July 15 (TYO): Assam-Nagaland arrtsü nung police outpost masü saka Assam police battalion camps amenoktsü atema Assam Chief Minister Himanta Biswa Sarma-i telemtetba agiba rara mesük tasa yangluba lir. Tia maka iba ama mera agiba ki kidanger tajung tesendaktep tangatetba anema lir, aser Assam nung tejangraba nung yimtenren tsütsü telemtetba agiba lir, ta Rising People's Party sangdong ka ajanga ashi.

Kechi koma ka asüyonga lenir ajaki tatem nungbo pei li aser nübur taginüba nung nokdaker, aser meimlai lia Sarma-i sangdongba ya kasaji lir, ta ashi.

July 17 nü Northeast nung aliba Chief Minister tem den Home Minister Amit Shah-i senden

amentsü lia iba ama mera agiba ya ajanga Sarma-i kidanger state tem den arrtsü tebilemstü tajungleni angateteptsü memolungba sayur, ta RPP ajanga ashi.

Anungji nüburtemi metetnübaji, asen sorkara arrtsü atema kechi sentong lir? PDA sorkari iba ken o tajungtiba nung angateteptsü renema lir asi? Assam den arrtsü mangatetep ken o ya tang tasen ka masü. Iba ken o ya tang Supreme Court nung tejembidak lir, aser kidanger linük nungi state anema arrtsü len tebilemstü khuret agütsüba, lenmang aser rongsenketzung nung tenokdanga agütsüba aiben ajangshia arur, ta parnok i ashi.

July 13 nü Assembly nung Assam Chief Minister ajanga osang

agütsüba asoshi Chief Minister Rio-i yimjak nung telangzüba agütsütsüla. Lenir ka ama CM-i Nagaland nung aliba nüburtem dang arrtsülen ali, takum aser nüburtem indang ki-o-jen ya wazüka ayutsü, ta shitettsüla.

PDA sorkari arrtsü tebilemstü asoshi kechi teinyaktsü sentong ali, itemji tezüluba nung tejangja sayutettsüla, ta RPP ajanga ashi.

Mizoram sorkaria par litsü Assam-i tim masüba nung agiba nungi kumzüka ayutsü nangzüko. Mizoram indang Home Minister-i yimjak nung, state litsü-lika wazüka ayutsü aser Mizoram-Assam arrtsülen nisung takum aser ki-o-jen kumzüka ayutsü atema state police tem arrtsüleni yokogo, ta sangdongogo, ta parnok i ashi.

High Court-i anganwadi centre tem lapoktsü tuyu

Kohima, Chiteni/July 15 (TYO): Gauhati High Court (GHC) Kohima Bench-i, Nagaland sorkar aser Social Welfare and Food aser Civil Supplies Departments dang, temsüa alirtem ajangzüksü atema Anganwadi Centre tem lapoktsü tetuyuba agütsüogo.

India temzüng ozüng ocet 226 dak ajemdaker PIL benokba ka angadanga sülen okadak ajak iba tetuyuba agüja liasü

PIL ya AG Colony Kohima nung alir Mhasikhonuo Phinyo-i, Nagaland sorkar, Social Welfare Department, Food & Civil Supplies Department aser India sorkar anema Justice Songkhupchung Serto aser Justice S. Hukato Swu matsüngdang benok.

Ken o benoker tenüng nung Advocate Neiteo Koza-i, mama yongdakja aliba tetsütem aser tanur shirnok tekübokba jenjang nung lir, parnok Angawadi centre tem shibangba ajanga Food Security Act kübok tangutsü tim mongui arudar. Angawadi centre tem ajanga Food Security Act aser tanga sorkar scheme tem kübok parnok nem chiyongtsü aser service tem agütsür, ta ashi.

Laisa, wara pokteter aliba ajanga lokti nung item telok ya COVID-19 tashidak nungi jenboa alitsü atema immune system ajungkettsü asoshi chiyongtsü tajung nungdaka lir, anungji state sorkari Angawadi centre tem lapokshitsüla, ajita asünungdang centre tem ajanga agütsüba service tem nüburtem

tonga aotsü, ta ashi.

Lai Food Security Act section 4,5,6,7 aser 8 tetshia jembi, kong linük nung lisopurtem nem iba amala service agütsüba ya temeden ka ama züngshir, ta ashi. Laisa, Deepika Jagatram Sahani vs Union of India aser tangartem ken o, Joint Secretary (ICDS), Government of India aser Ministry of Women and Child development-i state aser Union Territories ajak nung Angawadi service achaayangba Principal Secretaries/Secretaries tem dang nungdaka aliba purtem nem ki tonga oa teyari agütsütsü atema Angawadi worker tem amshitsü tuyua shiti züluba indang benoka jembi.

(Maneni tapak 2 nung...)

Covid putetaka meshirangertem pei kidang takdang balaka nung mongdaksür, idangji -

Pei alidak aser ayipdak mopong aittsüsa kichiba (window & ventilation) lapoka yuang.

Akok tashi süngjanglijang aser süngolemba agi tua chiyongtsü tajung Chiang aser tzu aser juice jemang.

Pei meyong mobile phone, kumesü aser toothbrush nung ama melentepa tamshi.

Mozü achitsü agüja lira, aji shitak Chiang.

Tango junga mesashitetba, teku ashiba, aketba aser temang metabata timtem lira yakta doctor bushiang.



APC-i core committee senden ka ayongzüka amen



Y Kikheto Sema, IAS lenisüba nung July 15 nü Secretariat conference hall nung Agri & Allied department core committee senden aliba noksa nung angur.

Dimapur, Chiteni/July 15 (TYO): Agriculture Production Commissioner, Y Kikheto Sema, IAS lenisüba nung July 15 nü Secretariat conference hall nung Agri & Allied department core committee senden ka menogo. State nung tsüngsarosa tali asüba ajanga timtem adokba asadangtsü atema senden ayonga amen.

Senden nung APC Kikheto Sema-i, wara pokteter aliba ajanga dang masü saka taküm tzünglu junga maruba ajanga state timtem nung lir ta ashi. Paisa, alu timba ka nung metsüjangnatsütem memeko aser metsüjangnatsü mekobatem tashi Fall Army Worm (FAW) agi raksatsü, ta ashi.

APC-i, tzünglu peria maruba ajanga tekonglu nung kongshiogo aser tsüngsang mongpu kasa dang ora tzülu nunga kongshitsü, ta ashi. Pai, state nung tzümgang tulutem aser check dam tali yanglutsü, ayong aser tzübotem mesemtetshitsü aser tzünglutzü benden ayutsü nüngdakba lemsatöp, ajita asünung dang taküm ama tsüngsarosa mapang aluyimba nung tetsükdaktsü kecha madoktsü, ta ashi.

K.T. Sukhalu-i Public Accounts Committee senden ayong

Dimapur, Chiteni/July 15 (TYO): Advisor, School Education aser Public Accounts Committee, Nagaland Legislative Assembly, mendenbuba K.T.

Lizu old Village nung Covid-19 vaccine agütsüjemogo



Dimapur, Chiteni/July 15 (TYO): Zunheboto kübok Lizu old village nung alirtem nem COVID 19 vaccine dose mezüngbuba agütsüjemogo. Iba yimtsü nung 13/04/2021, June 4, 6 aser 27 aser July 11 nü vaccine agüja liasü.

Yimtsü nung vaccine agitsü memulungtem aika

Chiyongtsü bendena ayutsüba indang jembiba mapang pai, chiyongtsü bendena ayutsü atema aika jembio, saka tzü bendena ayutsü atema süoki ia minyaker, ta ashiba den tzü peria aliba ajanga dang chiyongtsü tali adokdaktsütetsü aser chiyongtsü bendena yutetsü, ta ashi.

Maneni Sema-isa, Agri & allied department dang, parnok indang scheme aser sentongtem mapang shidak nung aser jung junga benoka inyaktü mepeshiba den item maparentem shidak benoka minyakba department anema jenjang tapet agitsü, ta ashi.

Senden nung züngsemtemi onük balala benoka sensak asema sülen, irrigation aser tzü dak sendaka aliba projects aser scheme benoka inyakba department ajaki aluyimba nung teyari agütsütsü asoshi tzü bendentsü atema jenjang tapet agitsü asoshi tongpu apur inyaktü lemtet. Senden nungsa aluyimertem takoksa ajuru aliba tera danga mesemtsü atema September ita tashi nungbo Rabi metsüjangnatsü lemtsütsü, eri longben, san napong aser tanga kiset shirurutem metsütsü

ajungshitsü lemtet.

Maneni scheme aser sentongtem mapang shidak nung achaayangtsü atema AHOds/HoDs temi District/Sub Divisional Officers tem pei tata tesem nung amenoker mapa shidak inyaktü atema jenjang tapet agitsü, Core Committee aser District officers temi tsüngsarosa agi kongshir aliba tesemtem semdanga tensa asadangtsü aser iba ajanga kongshir aliba aluyimertem yaritsü atema sentong yanglutsü, lepa reprangshiba senden ka September ita amentsü, Dimapur Agri & Allied Departments District officers tem ajak Agri Expo Dimapur nung Administrative building nung lidaktsütsü atema benoktsü telemtetba agia liasü.

Senden nung Agriculture, Horticulture and AH & Vety services, Fisheries and A.R Land resource, Sericulture, Water Resources aser Cooperation, Soil & Water conservation Department-i power point presentation agütsü aser tzünglu peria maruba ajanga Nagaland kübok district balala nung aonsotsü junga mezüsentetba indang lemsatopa liasü.

Sukhalu-i sangdong ka ajanga, July 20 nü 11:00 ako nungi tenzüka Assembly Secretariat Committee Room nung Committee senden ka amentsü

ayongzüka metetdaktsüogo. Iba senden nung Committee züngsemtem ajak tamakok maludaktsü jangrabangra arua adentsü paisa metetdaktsü.

AHOd aser HoD senden July 19 nü amentsü

Dimapur, Chiteni/July 15 (TYO): Administrative Heads of Departments aser Heads of Departments senden ka July 19 nü 1:00 ako nungi tenzüka Secretariat Conference Hall, Kohima nung amentsü. Senden nung <http://meet.google.com/rrt-dwcv-qhx> ajanga virtually adentsü akok.

Senden nung district balala nung Heads of offices aser staff attendance, directorates aser secretariat densema officers/ staff tem vaccine agiba jenjang, 03/08/2021 nungi tenzüka Nagaland Legislative Assembly

session tibuba amentsü aliba, Nagaland Rules of Executive Business, 2020- Adherence thereof; department balalai teti atema mesera terms and conditions balala dak ajemdaker legal advisors/ consultants/ retainership shimba aser department balala indang email aser tanga contact details tem Government websites nung update asütsüba onük balala benoka sensak asemtsü.

AHOds aser HoDs tem ajak iba senden nung tamakok maludaktsü adentsü metetdaktsüogo.

Kiphire nung Cavach project tenzüko

Dimapur, Chiteni/July 15 (TYO): Kiphire aspirational district nung Empower Group of Medical structure indang chairman, Dr. Vinod K. Paul-i July 15, 2021 nü Project Cavach tenzütsüogo.

COVID-19 mozü agiba maparen tali tashi itshitsü nükjidong nung Cavach project ya yanglu, kechiaser Kiphire nung COVID-19 mozü agir kanga ajema lir.

Ibai PPP (public private partnership) yimya nung lir aser project ya NSC ajanga Karuna Trust den lungjemer sen agütsür.

Iba project kübok Panchayat level nung awareness sentong ayongzüksü, Community Champion program agitsü, Sub-

Centre 25 nem screening osettem lema agütsütsü, community champion temi ki sema aotsü aser ken, video, FM radio advertisement ajanga IEC osettem alemba indang osangtem sangdongtsü.

Karuna Trust ajanga District Administration den lungjemer iba project ya district kübok yimtsüng ajak nung ita tuko atema inyaktü.

Iba sentong ya virtual yimya nung video conference ajanga tenzü, kong Deputy Commissioner, Kiphire, T. Wati Aier aser Karuna Trust nungi Dr. Chinole Magh Rengma aser linük nung district asem nungi District Collector tem dena liasü.

Security Forces temi temesepba mozü ayoker ana apu



Dimapur, Chiteni/July 15 (TYO): Security Forces temi police den lungjemer general area Zunheboto Town, Zunheboto district nung operation ka agiba mapang temesepba mozü ayoker ana ashi.

Osang tejangja kar nung ajemdaker Security Forces aser police temi July 13, 2021 nü

operation agiba mapang temesepba mozü ayoker ana apu aser tena ket nungi sen 33,000 jenjang SP Tablets 700, Alprazolam Tablet 241 aser mobile phone ana nguteta liasü.

Pua alisang ana den tena ket nungi ngutetba oset ya maneni asüngdangyatsü atema Zunheboto Police Station, Zunheboto nem agütsüogo, ta sangdong ajangasa ashi.

High Court-i anganwadi... (TAPAK 1 NUNGI...)

Ken o dak sendakba nung GHC Kohima Bench-i ashiba agi, osang ya state kübok district ajak nungi bendenogo aser item osangtem angadanger Angawadi centre tem shibanga aliba ajanga nüburtem tangutsü tim service mangur ta angateter.

Respondents tenüng nung nokdakba counsels ana nem respondents indang affidavits file asütsü atema mapang agütsütsü nüngdaker ta ashiba den Food Security Act, Supreme Court aser Union sorkari Joint Secretary, Integrated Child Development Services (ICDS), Government of India, Ministry of Women and Child Development ajanga tetuyuba agütsüba dak ajemdaker lokti nung tekübokba jenjang nung aliba nüburtem nem parnok tangutsü tim

agütsütsü nüngdaker, ta ashi.

Anungji GHC Kohima Bench-i state sorkar aser department ana dang Supreme Court tetuyuba aser Food Security Act dak ajemdaker item nisungtem nem parnok tangutsü tim agütsütsü asoshi tetuyuba agütsüogo.

"Wara pokteter aliba ajanga sensakertem tamajungtiba kongshiogo aser parnok teyari kanga nüngdaka lir. Anungji service aser tajangzükttem ajak parnok kishi tonga bener otsütsü atema iba dak sendaka alirtem khuret asütsüla," ta HC-i ashi.

July 28 nü ken o maneni angadangtsü latettsüba den HC-i sorkar respondents dang affidavit of compliance ka file asütsü aser writ petition dak sendakba nung telangzüba agütsütsü tuyuogo.

Manipur HC-i dokan aser

office melapoktsü tuyu

Imphal, Chiteni/July 15 (Agencies): Manipur High Court-i state sorkar dang Manipur nung office, dokan aser tanga business establishment tem melapoktsü atema tetuyuba agütsüogo, kechiyong state nung COVID-19 tensa ano mejungi lir.

Tetuyuba agütsüba mapang Manipur High Court-i, office, dokan aser tanga business establishment tem lapokshitsü atema osang agütsüba atema state sorkar aija liasü.

Manipur sorkari June 30 nü office, dokan aser tanga business establishment tem lapokshitsü atema tetuyuba agütsüba liasü.

Manipur sorkarisa vaccine dose anaprongla agir aliba sorkar aser private sector tem nung inyakertem dang office-i aotsü tetuyuba agütsüba liasü.

Kasa sangdong ajanga state sorkari office, dokan aser tanga business establishment tem lapokshitsü atema tongtangsüa inyaktsü ta shia lir.

Manipur nung Osbert Khaling-i PIL ka benokba angadanga sülen Manipur High Court-i iba tetuyuba agütsüba liasü.

Iba PIL ajanga Manipur sorkari June 30 nü osang prokshiba ashishia liasü.

PIL nung, vaccine agir alirtema COVID-19 menatsü akok aser parnok tashidak prokshir kaka akütsü, ta shia lir.

Assam nung ozüng alema arua alir bendanger lakh 1.4 potetogo: Minister

Guwahati, Chiteni/July 15 (Agencies): Assam Accord dak ajemdaker tang tashi nung Assam nung ozüng alema bendanger arua alir lakh 1.4 shi potetogo aser nisung 30,000 shi meyipa yokogo.

Asom Gana Parishad MLA Ramendra Narayan Kalita-i Assembly nung iba ken o ashishiba mapang Implementation of Assam Accord Minister Atul Bora-i iba osang metetdaksü.

Minister Bora-i house dang, Assam nung tang tashi nung ozüng alema lia alir bendanger 1, 39,910 potetogo, ta ashi.

Assam Accord kübok Bendanger shirnok 1971 küm March 25 sülen Assam-i arua lir parnok bushiteta electoral rolls nungi parnok tenüing aginba sülen parnok aruba tesemi meyipa yoktsü lateta lir.

Item bendangertem rongnung 29,984 meyipa yokogo, ta minister-i ashi, ajisüaka item bendangertem aruba linük indang osang tejangja magütsü.

Maneni Bora-i, Foreigners Tribunals 300 asem amenok lir aser item rongnung 100 dang kanga junga inyakshidar, ta ashi.

India- Bangladesh arrtsü nung merang inzü agi atsü atsüba dak sendakba nung lai, mapa shilem 98.35 bo tembanga inyakogo, ta ashi

"Border Guard Bangladesh (BGB)-i ashishiba ajanga Karimganj district nung arrtsü km 4.35 ano matsübangi lir," ta Bora-i ashi.

Mizoram nung tanur 115 densema nisung 581 dak Covid potet

Aizawl, Chiteni/July 15 (Agencies): Mizoram nung maneni COVID-19 tashidak agi kangshidar aser nisung 581 dak tashidak potetba sülen state nung tashidak menar 25,751 jungogo, ta health department ketdangsür kati Brehostibarnü metetdaksü.

Brehostibarnü tashidak potetertem rongnung tanur 115 aser Border Security Force (BSF) sepai ana densema liasü.

Brehostibar anepdang Zoram Medical College (ZMC) nung Aizawl district nungi arishi küm

74 tain tetsür ka tashidak menar asüba sülen state nung Covid agi asür 116 jungogo, ta paisa metetdaksü.

Tashidak menar 581 rongnungi nisung 59 dak ZMC nung tashidak potet. Tashidak menartem rongnung nisung 25 TrueNat ajanga aser nisung 497 Rapid Antigen Test ajanga tashidak poteta liasü.

Kasa mapang nung District tem rongnung Aizawl district nung nisung 272, Kolasib district nung 129, Lunglei district 58,

Mamit district 57, Lawngtlai district 49, Siaha district 8, Champhai district 5, Serchhip district 2 aser Hnahthial district nung nisung ka dak tashidak potetogo.

Tesüsa tashidak potetertem rongnung nisung 283 dak COVID-19 tashidak keta aliba temaitsü sayudar aser tanungba nisung 298 dak temaitsü kecha mesayur, ta paisa ashi.

Brehostibarnü positivity rate ya 11.06 percent liasü, kechiyong sample 5,253 tendangba nungi

581 dak tashidak potetogo.

Mizoram nung tang tashidak agi tonger nisung 5,373 temang anepaludar aser Bodhbarnü nisung 267 taneptsü anguba densema nisung 20,262 taneptsü nguogo.

State nung tanü tashi nung sample 5.4 lakh tendangogo.

State immunisation officer Dr Lalzawmi-i ashiba agi, tang tashi nung nisung 5,91,778 nem vaccine agütsüogo aser item nisungtem rongnungi nisung lakh ka tema vaccine dose anaprongla agiogo.

DEBTS RECOVERY TRIBUNAL, GUWAHATI

Government of India, Ministry of Finance
Department of Financial Services (Banking Division)
Suwarna Bhawan, House No. 12, New Town Path,
G.S. Road, Ulubari, Guwahati- 781007

NOTICE OF DEMAND TO THE CERTIFICATE DEBTOR(S)

(See Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961)

D.R.P.C. No. 3510/2019

Bank of Baroda (Erstwhile Vijaya Bank) -Vs- M/S. K KERETSU & ANR.

To,

1. (CD-1) M/S. K KERETSU

Prop.- Mr. Thejasetuo Keretsu, Son of Mr. Maizieozlie Keretsu, VIPIELIE Complex, Shop No. FG 16, Razhu Point, Opposite Axis Bank, Kohima, Nagaland- 797001.

2. (CD-2) MS. K KERETSU

Wife of Mr. Thejasetuo Keretsu, H. No. CD-87, D KHEL, Kohima Village, Kohima, Nagaland- 797001.

This is to certify that a sum of **Rs.25,33,101.00 (Rupees Twenty Five Lakhs Thirty Three Thousands One Hundred One only)** as per details given below has become due from you consequent to a Recovery Certificate issued by the Ld. Presiding Officer by an order dated 27-05-2019 in Case No. O.A. No. 519 of 2018.

(1) Amount due as per the Certificate Amount:	Rs. 25,33,101.00
(2) Interest from 29.11.2018 to 25.09.2020 @ 12.50%	Rs. 6,37,071.33
(3) Costs	Rs. 28,000.00
TOTAL	Rs. 31,98,172.33

2. You are hereby directed to pay the above sum within 15 days of the receipt of this notice failing which the recovery shall be made in accordance with the provisions of Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961.

In additions to the sums aforesaid, you will be also liable for

(a) such interest as is payable in accordance with the recovery certificate (D.R.P.C. No. 3510 dated 27.05.2019) for the period commencing immediately after issue of recovery certificate to the date of realization, and

(b) all costs, charges and expenses incurred in respect of the services of notices and of warrants and other processes and proceedings taken for realization of the dues.

GIVEN UNDER MY HAND AND SEAL ON 9TH DAY OF JULY, 2021.

(Sudhir Kumar)
RECOVERY OFFICER

DEBTS RECOVERY TRIBUNAL, GUWAHATI

Government of India, Ministry of Finance
Department of Financial Services (Banking Division)
Suwarna Bhawan, House No. 12, New Town Path,
G.S. Road, Ulubari, Guwahati- 781007

NOTICE OF DEMAND TO THE CERTIFICATE DEBTOR(S)

(See Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961)

D.R.P.C. No. 3341/2019

Bank of Baroda (Erstwhile Vijaya Bank) -Vs- Mrs. Beni Terhuja & Ors.

To,

Mrs. Beni Terhuja,

Wife of Sri Kavi Terhuja, House No.- 174, Opposite Spirit of Faith Church, Half Nagarajan 'B' Dimapur, Nagaland- 797112. (Certificate Debtor No.1)

Sri Kavi Terhuja,

Son of Sri Ruunukho Terhuja, House No.- 174, Opposite Spirit of Faith Church, Half Nagarajan 'B' Dimapur, Nagaland- 797112. (Certificate Debtor No.2)

Mr. Z Haralu,

Son of T. Haralu, House No.- 77, Bank Colony, Block- III, Dimapur, Nagaland- 797112. (Certificate Debtor No.3)

This is to certify that a sum of **Rs.12,56,282.00 (Rupees Twelve Lakhs Fifty Six Thousand Two Hundred Eighty Two only)** as per details given below has become due from you consequent to a Recovery Certificate issued by the Ld. Presiding Officer by an order dated 31-01-2019 in Case No. O.A. No. 280 of 2018.

(1) Amount due as per the Certificate Amount:	Rs. 12,56,282.00
(2) Interest from 11.06.2018 to 05.03.2021 @ 11.5%	Rs. 4,55,559.00
(3) Costs	Rs. 15,000.00
TOTAL	Rs. 17,26,841.00

2. You are hereby directed to pay the above sum within 15 days of the receipt of this notice failing which the recovery shall be made in accordance with the provisions of Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961.

In additions to the sums aforesaid, you will be also liable for

(a) such interest as is payable in accordance with the recovery certificate (D.R.P.C. No. 3341 dated 31.01.2019) for the period commencing immediately after issue of recovery certificate to the date of realization, and

(b) all costs, charges and expenses incurred in respect of the services of notices and of warrants and other processes and proceedings taken for realization of the dues.

GIVEN UNDER MY HAND AND SEAL ON 9TH DAY OF JULY, 2021.

(Sudhir Kumar)
RECOVERY OFFICER

DEBTS RECOVERY TRIBUNAL, GUWAHATI

Government of India, Ministry of Finance
Department of Financial Services (Banking Division)
Suwarna Bhawan, House No. 12, New Town Path,
G.S. Road, Ulubari, Guwahati- 781007

NOTICE OF DEMAND TO THE CERTIFICATE DEBTOR(S)

(See Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961)

D.R.P.C. No. 3527/2019

Bank of Baroda (Erstwhile Vijaya Bank)

-Versus-

MR. TZUWATONG JAMIR AND ANR.

To,

1. (CD-1) MR. TZUWATONG JAMIR

Son of Imcha Jamir, Resident of H. No.- C 469, Lower Chandmari, Kohima, Nagaland- 797001.

2. (CD-2) MRS. ROPFUVINO SOPHIE

Wife of Tzuwatong Jamir, Resident of H. No.- C 469, Lower Chandmari, Kohima, Nagaland- 797001.

This is to certify that a sum of **Rs.18,34,723.18 (Rupees Eighteen Lakhs Thirty Four Thousands Seven Hundred Twenty Three and Paise Eighteen only)** as per details given below has become due from you consequent to a Recovery Certificate issued by the Ld. Presiding Officer by an order dated 27-05-2019 in Case No. O.A. No. 520 of 2018.

(1) Amount due as per the Certificate Amount:	Rs. 18,34,723.18
(2) Interest from 29.11.2018 to 25.09.2020 @ 13.00%	Rs. 4,94,108.60
(3) Costs	Rs. 21,000.00
TOTAL	Rs. 23,49,831.78

2. You are hereby directed to pay the above sum within 15 days of the receipt of this notice failing which the recovery shall be made in accordance with the provisions of Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961.

In additions to the sums aforesaid, you will be also liable for

(a) such interest as is payable in accordance with the recovery certificate (D.R.P.C. No. 3527 dated 27.05.2019) for the period commencing immediately after issue of recovery certificate to the date of realization, and

(b) all costs, charges and expenses incurred in respect of the services of notices and of warrants and other processes and proceedings taken for realization of the dues.

GIVEN UNDER MY HAND AND SEAL ON 9TH DAY OF JULY, 2021.

(Sudhir Kumar)
RECOVERY OFFICER

DEBTS RECOVERY TRIBUNAL, GUWAHATI

Government of India, Ministry of Finance
Department of Financial Services (Banking Division)
Suwarna Bhawan, House No. 12, New Town Path,
G.S. Road, Ulubari, Guwahati- 781007

NOTICE OF DEMAND TO THE CERTIFICATE DEBTOR(S)

(See Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961)

D.R.P.C. No. 3511/2019

Bank of Baroda (Erstwhile Vijaya Bank)

-Versus-

MR. N TOVISHE ACHUMI AND ANR.

To,

1. (CD-1) MR. N TOVISHE ACHUMI

Son of Shri I Nitovi Achumi, House No. 109, Fellow Ship Colony, Dimapur, Nagaland- 797112.

2. (CD-2) MR. SHIHOVI ACHUMI

Son of Shri I Nitovi Achumi, Naitoqa, 8th B.N. NAP Head Quarter, Zunheboto, Nagaland- 797112.

This is to certify that a sum of **Rs.18,36,972.00 (Rupees Eighteen Lakhs Thirty Six Thousands Nine Hundred Seventy Two only)** as per details given below has become due from you consequent to a Recovery Certificate issued by the Ld. Presiding Officer by an order dated 17-05-2019 in Case No. O.A. No. 291 of 2018.

(1) Amount due as per the Certificate Amount:	Rs. 18,36,972.00
(2) Interest from 14.06.2018 to 25.09.2020 @ 13.50%	Rs. 6,49,402.38
(3) Costs	Rs. 21,000.00
TOTAL	Rs. 25,07,374.38

2. You are hereby directed to pay the above sum within 15 days of the receipt of this notice failing which the recovery shall be made in accordance with the provisions of Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961.

In additions to the sums aforesaid, you will be also liable for

(a) such interest as is payable in accordance with the recovery certificate (D.R.P.C. No. 3511 dated 17.05.2019) for the period commencing immediately after issue of recovery certificate to the date of realization, and

(b) all costs, charges and expenses incurred in respect of the services of notices and of warrants and other processes and proceedings taken for realization of the dues.

GIVEN UNDER MY HAND AND SEAL ON 9TH DAY OF JULY, 2021.

(Sudhir Kumar)
RECOVERY OFFICER



TIR YIMYIM YIMOBILEM (EDITORIAL)

DIMAPUR ROGONÜ, CHITENI (JULY) 16, 2021

Kaketreju tanemtanemi lapoktsüla

Joko alima nung Covid tashidak wara poktetadokerji ya meshimeshia tangbosa mesamatsü, anungji joko tashidak memenatsü aser meprokshitsüsa kanga kümdanga alitsü aser joko mapa ajak tanem-tanemi tenzüka aotsü kanga nungdaka kümogo. Item mapatem rongnung tongtibang kaji, tanurtem asoshi kaketshidak kaketreju lapoktsüba ya asütsü. Joko, yaküm 2020 küm nungi kaketreju ajak shibangadok nungji, akhi ama, tanurtem kaketshisatsü angazükdak makaba ajanga tanurtem aika kanga akoksadagi. Taintem asoshiho anema dang lira mesüra tasü dang mesüi taküm lira, kodang tensa mapang junga kümdir idangji akhi mapatem tanaben tenzüksia inyaka aotsü aser tang takoksa angubatema menokteta inyaka otettsü. Ajisüaka, tanurtem asoshiho yamaji masü, kechiyong taküm arishi ya telatet ka dang lir, anungji tanur asüadang angazüksüba kaketshisatsü mesüra tamangba tsütsüa Sunday school nung angazüksübatem to tain kümerbo mangazüknütsü aser temenua menuadoker asütsü. Iba tangatetba nung kaketshisatsü renlokdahtsüba maparen nung mongintemi tanur küm asem pezü tain asüadang nungi tain küma angazüksü asoshi küm shia class balala nung mena angazüksü atema tazüngtsü kaket balala renemtsür. Itemji tapi agi renemba "academic course" ka masü saka ki yangludang tamasa ali tua ki amendaktsü atema 'foundation' nükmen yangluba amai lir. Anungji, tanur tila asüba mapang tangazüksü ka mangazük ser tain kümer temaba class nung amenba jagi temangmangang adentsü. Iba kasa timtem takoksa taji tang tanurtem aikati ajurudagi. Atangji, kidanga sayutettsüsa tsüraburtema lir saka ano tsürabur teimbakati tanurtem dang mesayutetter. Ano, kaketshisatsü angazükba maparen nung ya kaket dang masü saka medemertem den külemi telok kümer kaketreju ka nung azüngdang sobaliba, awashi aser kentenmenü aika angazüker aser itemji taküm piyong atema tagitsü küma amshia aoer. Tanü tensa agi tanurtemi item maongkaji mangur ,anungji alima mangu ser küm ana agi tain kümogo. Ano, kaketshir taintem asoshia takoksa kaji, yaküm nungi kaketreju tonga mao kidang nungi dang online nung angazüker aser tatidanga pei kidang nungi dang agütsür, anungji item ajakji Covid marudang " Correspondence Course " mesüra "Distance education" agiba amai kümadokogo. Itemji temulung agüja bushir aser kidang lesson mangatetbatem sayutsüsa alirtem asoshiho junger, saka temulung magütsür aser kidang teyari angutsüsa tesayur malirtem atemabo kanga tasak aser timtem tulu lir. Iba jagi, joko kechianga mesayang, kaketshirtem karibo kaket nungi ajizüka zülur aser karibo tangar nem züludaktsür. Aji oda, tatidang nung aruba tasüngdangba dena mangatet ser kaket nung ajizüka langzüba agi mapang agi magishitsüsa onsara talangka zülüadokba osanga angashir. Iba amaji pei kidang nungi tatidang agütsüba nungji tangazükba aser temetetba melii takok angutsü koka lir. Tanur ka asoshi taküm piyong timtemtsübaji aji ka asütsü. Item timtem aser takoksatem nungi jenbuttsü atema School Education department-i tensa mapang dak apet tanem tanemi school-a lapoka aotsüsa sentong yanglutsü nungdaka reprangtetter. Aji oda, All Nagaland Private Schools' Association purtemi government dang shidangba ama, class ajak melapokyonga tamasa class 8, 10, 12 amalaji lapoktsü mela nunga ajungtsü. Ano, khen bilemdangtsübaji, item class-temji dang masü saka tsünglangen class A,B aser 1 purtem asoshia lapoktsü nung item tanurtemji kaketshisatsü bushibaren nung nükmen meraksai shitak otettsü. Aji oda, tang amai Covid tensa tamajungba mekümra, kaketreju nung kaketshirtemji telok ana küma lemsar kar anepdang aser kar nikongtsütsü ta tongtibang lesson-tem sayu tenzüng nung ajungtsü südi. Atangji, tanurtem kaketshidaki yoktsü atidaka bilembaji küm 18 ser teküpoklen purtem atema vaccine yanglutetba makaba ajanga lir, iba jagi arendaker aser aji shitak, kechiyong tia majungka kaketreju nung sentepa alidak tanurtem rongnung tashidak wara mejungi menatempa ao nungbo, lendongji aji asütsü. Item ajakji yimsüsür aser ketdangsertemi tashidak aser mozü tsütsü mongin nisungtem den shisalemsatempa, menua melii, ajak kenyongi mesüaka tanem tanemi kaketrejutem lapoka tanurtem nem kaketshisatsü shitak agütsütettsüa sentong atongtsüla. Tarutsü lima yanglutsüba ya tashiyim agi masü aser nütsüng aika asüba agia masü saka lanurtem dak tashitemetet aliba ajanga yanglutsü. Ibaji bilema, alima tensa mejungaka, kechisüdirsüaka tazüngba degree dang masü saka alima tajungba küma yanglutettsüsa tanurtem nem shitakba tashitemetet, shisatsü aser jakla yimya agütsütettsüsa tapet sentong yanglutsü rongdak nungdaka kümogo.

OLEMSABANG

N. TALITEMJEN JAMIR-I ZÜLUBA TARNUNGER OTSÜ KAKET

- Wati Longchar (Serampore)

N. Talitemjen Jamir-i züluba kaket Tarnunger Otsü janratema temoatsü ngua züngogo. Nisung aikati kodang tarnunger otsü ta asü, itemi nisung purapoji otsü amai bilemter. Saka kin ka koda liyonga aru aser aotsü iba wain-shin puti otsütem nungji shia angutsü lir. Lenir N. Talitemjen Jamir-i züluba kaket, Tarnunger Otsü kaket nung otsü ajak agi 38 angutsü. Kodang itemji arok aroka züngdir kin ka jakzüka aruba, kiba-lempu, awashi, sobaliba, lipoklisang, tamang maparen kimongji ya ta angatettsü. Tongmelang agi, tarnunger otsü ajanga Aor Chungliyimti putu nungi Soyim, aser iba nungjagi nütsüng zünba den Ao yim tekong balalai prokshia oakasa, tarnunger otsü ajanga Ao kin ayak ya aser otsütem ajanga kin ka telungjem kimong yangertsür ta angatettsü.

Asen otsüla-oboula putu nungi tepang o agi otsü, tsüzüng-ozüng, putipuyang ajak belentepyonga shia aru. Anungji tarnunger otsü azüngba aser ratetba nung temetettsü kar shisemner: Mezüngbuba nung, tarnunger otsü ya kodanga melenshitsü makokba (never changing stories) otsü ka masü; teti melenshir (dynamic and changing stories). Lokti ainba den taliba yimya, jenjang melenshir aser iba temelenshi tensa denji peta otsüji ashir aser rateter. Ano khen khenbo audience balala - tanur dang, lanur dang, tain dang ta telok balala denji peta otsüji ashi. Otsüla-oboula putu parnok tongtepratep method-ji otsü aser ken ajanga liasü. Yongji otsü mulungjiibo kasa dang, saka khen khenbo jaka tenüng, shiruru, nisung tenüng balala amshiba angutsü. Tanabuba nung, otsüji mamatsü asoshi ken mejema aten, khen khenbo yar-tsüngsang den sentaktepa yanglu. Anungji kenji kodanga mamar asü nungji otsüjia mamar. Benjung nung nüburtemi yar-tsüng ajanga otsütemji mamai aru. Tasembuba nung, tarnunger otsüji shisashir teshimtet mongyin ishikati dangbo meratettsü, saka tazüngba maka pur (ordinary folk) otsüla, oboula, tsüraburi pei putu aser libaliro den apet ratettsü anungji mangatettsü o tarok kecha amshiba mangutsü. Nübur ajaki angatettsüsa otsütemji ashi, aser pezübuba nung, otsü nükjiongji mulungdangtsü o, wain-shin, sobaliba aser taküm ka lokti nung liyonga aotsü iba indangji liasü. Anungji anogo shia liyonga aodang ajangshiba mapa dak sentaka otsüji ashiba ajanga nüburtemi otsüji mamai taküm nung bentshia aru.

Shisaluyim riju tenzüka aoba den tangar kin aser alima otsüang teimba azüngtsü aser angazüksüsa aküm. Tanurtem jila balala nung prokshia tsürabur nungi pila oa alitsüsa putu kati bener arutsü. Ano otsü meteter tsürabur aika iba lima nungi pilar, joko otsü meteter aser ashir mali ta akümba putu ka nung lenir N. Talitemjen Jamir, Ungma, pai nükmen bülema lanu putu asoshi iba Tarnunger Otsü koba Ao kini jembia aru, itemji kaket küma zülutsü nung kanga dang pelar. Tarnunger otsü ya amadokra, asen Aor songjem senti rongsen, aser tarutsü senmang kimong ka tesama akümer asütsü. Tesayur Renthly Keitzar-i tarnunger otsü dang "Prime Bible", tetezü Aor asoshi ochi o, wain-shin, sobaliba tamentakdak kimong ta ashiba ama, iba senti senmang mesamadaktsü tarutsü putu asoshi rizünga yutsüba kaket ka ibai lir. Ibai prime source ya amshia lanu putu tashirtemi tensa den peta mulungdangtsü wain-shin ratettsü khuret den iba senti kaket lanurtem nem agütsür ta pela agizükdi. Iba kaket tadoktsü Dr. T. Lima Jamir aser shirnokisa lemanng balala ajanga yaritepogo, parnok ajak dang peladi.

AO O SPELLING [ZÜLUJANG] METONGSHIA ARUBA OTSÜ TONGMELANG AGI TATSÜKA

- Dr. S. Imkong Tushi Ao, Camp Dimapur.

Rev. S. Temjen Longkümer-i züluba ajanga Ao zülü otsü aser tangatetsü aeiga ajangzükoko. Pai züluba yarisema, O kar zülutsür.

- "Ano 1954 Nov. nungi mezüngbuba Ao O nung osang kaket 'Khriatan Taküm' adok. Tamangba/religious osang kaket sura aji shitak asütsü.
- Saka "Ao Milen" ya 1933 December, 3 buba Ao Students Conference (ASC), Waromong, Longritangchetba, President ASC asüadang, Subongnoklu, (Founder Member & Founder President ASC), Dacca Engineering School, tang Bangladesh, nungi arua aten. Pai - The Bengal Gazette, Statesman, Bengal oshi nung Jugetar aser Assamese oshi nung adokba Tapti bener arua zünga sayu, kong India nujsu indang aser anema alitsü, kaket shisatsü, etc, zülua liasü aser asen Ao Oshi nunga, asen Aor ajangzüktsü/angazüktsü, osang kaket adoktsü indang tuyu. ASC buri aji junger aser ita nung ken adoktsü lemted. Tenung (name) kechi ajatsü ta Missionary P.R. Wickstand, Impur, asüngdangdang, tenungji melemteti liasü aser pai 'The Ao Naga Messenger' ta ajatsü tuyu (proposed/suggested) aser aji agizük. Mokokchung SDO, E.T. Lambert dang temelaba agizüka osang kaketji adok. Tesulen iba osang kaketji "Ao Milen" ta melenshi aser tang tashi yamaji lir. (Source - Ao Milen lipok - T.Senka Ao, Editor).
- The Ao Naga Messenger/Ao Milen ya North East nung mezüngpur osangkaket rongnung ka lir, aser iba ya asen Aor atema konang/tetushi/terenlok ka.(one of the earliest newspapers in the North East of India and a pride for the Aos). * Ao Students Conference ya Christian High School, Jorhat, nung azüngertumi anir - Jorhat, Shillong, Dibrugarh students sentepa renum aser parnok lmtisosang-er kidang mena, pai-a advice sua tenzüng. Pa Bible School, Jorhat, Tesayur liasü, (1st Ao Matriculate, pa Matriculate asüadang Changki yimten-i, tepela agi nashi pungji ka tepseta pelatempa benjong ta angashi).
- '.... Oset zülur aikati spelling tai amshir. Yim o züluri (Editor-i) aji melenshir adoktsü nungbo ajungtsü ta bilemer.' Yamaji melenshir adoktsü nung tezülurji mejashili (hurt) ma ? Zülubaji asen tazünger-i angatetjumer toktsü/anen nunga junger.
- Züluri spelling mejangjara (Ao) Dictioary repranga zülü junger, kechiaser spelling tai amshiba agi oset-ji tebur mejongtsür.
- Ao Dictionary-a digitalize/computerize asünungbo, iba timtumji (Spelling aibelenba) ajemtsü.

(Ni out of Station nungi zülurji Ao Dictionary melel zülur, spelling aibelenba lira metongshia angateta a giangma).

Iba Olemsabang nung lemsaba ken-o aser shisatsü ya iba oset züluri bilemba ken-o ama tazünger-i angateta agitsü mepishir

Arogo nung Dalit nunger Khristantem nem maongka magütsür



July 10, 2021 nü Chennai nung National Council of Dalit Christians (NCDC) lenirtem senden amenba sülen tangokba noksa nung angur.

Chennai, July 15 (Agencies): Tamil Nadu nung Dalit Khristan organization balalai Catholic Arogo nung Dalit nunger nem tim temeden magütsüba aser maongka magütsüba anema Vatican tribunal dangi temepishiba shidi ka züluogo.

July 10, 2021 nü Dalit organizations-i India nung, talisa Tamil Nadu nung Dalit Khristantemi ajangshiba timtem balala Vatican Tribunal nem metetdaksü.

Osangbener den jembidang National Council of Dalit Christians (NCDC) Tamil Nadu state vice-president, S. Vincent-i, "Ozü teloki Arogo nung Dalit Khristantem bendanga züngshiba anema June 25 nü Madras High Court nung temepishiba ken o ka benokogo. Onoki kasa onükji Vatican tribunal nem-a metetdaksüner," ta metetdaksü.

"Onoki Vatican tribunal dang onok timtem repringshitsü aser onok nem tim temeden agütsütsü atema inyaksü mepishir. Onoki (Dalits) scheduled caste jenjang akhanger aser iba ken oji

Supreme Court nung benoka lir," ta paisa metetdaksü.

India nung 1950 küm Presidential order ka ajanga scheduled caste dangi meyipertem nem agütsüba maongka balala agienba sülen Dalit Khristantem aser Muslim nungeri scheduled castes jenjang akhanger.

Item maongkaji Sikhs (1956 küm) aser Buddhists (1990 küm) nembo tanaben agütsüogo, ajisüaka Khristan aser Muslim nunger nembo tanaben item maongka magütsür.

"Arogo nung onok (Dalits) majority lir, ajisüaka Arogo lenisüba nung Dalit nunger nem maongka magütsür," ta Vincent-isa metetdaksü.

Dalit nunger ya Hindu nunger society nung tajemreptiba jenjang nung aliba kin lir, ajisüaka parnok aika Khristan aser Islam yimsü dangi meyipogo.

"Tawa state nung Dalit nunger masüba nisung ana tongti putir shimba agi Dalit Khristantem mepelar, anungji onoki iba shidi ajanga takhangba onük balala

agütsür," ta NCDC state secretary, E. Yesudoss-i metetdaksü.

NCDC state coordinator, M. Johnson Durai-i, "Onoki Vatican tribunal dang India nunger Arogo nung kin telemsa nokdangtsü aser tejak repringa putir shimba anentsü mepishir. Dalit Catholic clerics meyrjang aika kanga temsüa lir, anungji parnok tenung ajak New Delhi nung aliba apostolic nunciature dangi yokogo," ta Yesudoss-isa metetdaksü.

Tamil Nadu nung Dalit nunger Catholic candidate aika temsüa lir, saka tongti putir shimba mapang nung parnok ajak sendoker.

Paisa, Holy See dang item candidates repringshitsü aser tang Tamil Nadu nung tongti putir menden tazüng pezü aliba atema parnok shimoktsü mepishiogo, ta metetdaksü.

Durai-isa, Vatican tribunal dang Arogo kar nung divine prayer service aser choir nung Dalit nunger lanurtembo maniokba tebilemtsü repringshidaksüner ta mepishiogo, ta metetdaksü.

Taküm September ita nung Pope Francis-i Hungary semdangtsü



Pope Francis

Budapest (Hungary), July 15 (Agencies): Taküm September ita nung Pope Francis-i Hungary linük yimtiba, Budapest semdangtsü aser International Catholic senden nung adentsü, ta Hungary Roman Catholic Arogo nung tongti putiri metetdaksü.

Osangbener den jembidang Esztergom-Budapest nung tongti putir, Peter Erdo-i, 2020 küm International Eucharistic Congress nung Pope Francis adentsü sentong liasü, ajisüaka coronavirus wara aliba agi iba

sentong thinena liasü, ta metetdaksü.

Anogo 8 nü 52buba Congress tatembangbuba anogo (September 12) sentong nung Pope Francis adentsü, ta Peter Erdo-isa metetdaksü.

"Pope-i semdangtsü aliba atema Arogo aser Episcopal conference kanga pelar. Tang ama timtem aliba tensa ka nung pai onok semdangba ajanga onok nem tesüner aser teimla agütsütsü imlar," ta Erdo-i ashi.

Facebook post ka ajanga Budapest liberal mayor, Gergely

Karacsony-ia, Francis-i iba yimti semdangtsü aliba ya tepelatsü osang ka aser akhümket ka lir, ta metetdaksü.

Karacsony-i, "Tanü putu nung asenoki Pope Francis dang nungi tangazütsü aika lir. Tamang aser meimchir indang dang masü saka onük aika nung pa dang nungi tangazütsü aika lir. Tawa sentong balala nung climate change aser alima kümzüka ayuba onok nunga pa dang nungi aika angazükogo," ta metetdaksü.

Italy nunger osangbenertem den jembidang Pope Francis-i, pai Budapest semdangba sülen kidanger linük Slovakia yimtiba, Bratislava-a semdangtsü, ta metetdaksüogo.

Slovakia Tir, Zuzana Caputova-ia, yaküm December ita nung senden ka nung adentsü atema lai Vatican semdangba mapang nung lai Pope dang linük semdangtsü mepishia liasü, ta metetdaksü.

ANOGO ABEN TSÜNGREM DEN

KOINONIA

"Saka Pa tesangwa nung aliba amaji asenokibo tesangwa nung jajara, asenoki kati ka den telongjem kar aser Pa Chir Yisu züh agi asenok temenen ajak nungi merükdaksür. 1 Yohan 1:7

KOINONIA ya Greek oshi nung tamanger külem telongjem dang ajar. Tasen Lai nung iba ojang 17 ben shia angutsü. Tamangertemji teti telongjem nung alitsüba asen sobutsü. Tsüngremer osangtajungjia asenok meimchir kati ka den putepshia longjemtsüba aser Tsüngrem den longjemshitsüba atemaji tera nung lir ta Yohani ashir. Saka tasen Lai mapang nung Korinth Arogo nung tebandang adokba indang asenoki Paul shity nung angur. Bangsentepba, nukmerem adokba, telemsa adokdaksür itemji khen anaben arütsür külenbo tagizük (Tita 3:10) ta ajang-ajanga shia angur.

1 Timothy 1:20 nung "Humenia aser Alexander, parnoki Tsüngrem tatalaba mejembitsü sayutsü asoshi, parnokji ni Satan nem bendanga agütsüogo. Tetezü parnok Arogo nungi atsüngba indang jembir. Shiri KOINONIA anema inyaker parnok temenenji kanga tulu aser parnok temerenshiji kanga tulu. Asenok tamangertem, putepshia, longjemshia, azüzüktepa alitsüji merangdi.

SARASADEM

Kibuba, onok Ne arogo, temang ka tenük telen kaka. Iba ya raksatsütsü temenen sentong nung onok metsüktsü yariangma. Amen

IRF atema Ambassador at Large shimtsü: Antony Blinken

Washington, D.C, July 15 (Agencies): Bodhbarnü

Washington D.C nung video conferencing ajanga International Religious Freedom (IRF) senden nung jembidang US Secretary of State, Antony Blinken-i, kobi melii IRF atema Ambassador at Large shimtsü, ta metetdaksü.

Taküm January ita nung Biden Administration-i office mapa agizükba mapang nungi Ambassador at Large menden ya tazüng liasü. Alima nung religious freedom jenjang ajungkettsütsü atema Ambassador-i tongti shilem agia inyaker.

Blinken-i, "Taruba hopta ishika tsüngda onoki International Religious Freedom atema Ambassador at Large shimtsü. Linüktem tsüngda tesendaktep atema religious freedom ya kanga tongtibang. Anogo shia International Religious Freedom, State Department Washington nung ozü team-i alima tesem balala nung America nunger ketdangsertem den longjemer inyaker. Religious freedom amokmeren jenjang asadanger, amalitepa inyaker aser lenmang bushir," ta metetdaksü.

International Religious Freedom Office nung tongtiji Ambassador at Large lir aser religious freedom movement

lenirtemi telemtetba agia shimtsü.

"Ambassador shimba ajanga alima nung religious freedom ajungkettsütsü atema Biden administration-i kanga nendaka inyakba kuli sayur," ta ICC Director of Advocacy, Matias Pertula-i metetdaksü.

"Iba onük atema US-i anir inyaksüla, aser iba atemaji ambassador shimtsüla," ta pai ashi.

International Religious Freedom Summit co-chair ji Sam Brownback lir aser Trump administration mapang nung IRF Ambassador at Large ji pa liasü.

Alima tesem ajaklen tamangba yimsü ajak sadoka amangtetsü atema International Christian Concern (ICC) densema organization balalai IRF Office aser Ambassador den amalitepa inyaker.

IRF summit nung tongti o jembitsüpurtem rongnung Tibet nunger lenir, Dalai Lama, taoba mapang Secretary of State Michael Pompeo, USAID Administrator Samantha Power, Speaker of the House of Representatives, Nancy Pelosi aser Senator James Lankford nunger densema lir.

Iba summit nung ICC-i India nung religious freedom jenjang osang metetdaksütsü.

PM Modi-i Varanasi nung sen cr. 1500 indang projects tenzüksü



July 15, 2021 nü Varanasi nung Ato kilonser, Narendra Modi-i International Cooperation & Convention Centre- Rudraksh semzüksüdü tangokba noksa nung angur.

New Delhi, Chiteni/July 15 (Agencies): Brihostibarnü Ato kilonser, Narendra Modi-i Varanasi yimti (Uttar Pradesh) nung sen crore 1,500 indang projects aika semzüksüba den külemi terenlok project aika tenzüksüogo.

Tongtibang projects rongnung Godaulia nung multi-level parking, tourism terenlok atema Ro-Ro Vessels aser Varanasi-Ghazipur Highway nung three-lane flyover bridge densema lir.

Ato kilonseri sen crore 744 indang project tenzüksü aser sen crore 839 indang projects semzüksüogo. Kasa sentong nungji Uttar Pradesh Angh, Anandiben Patel, UP chief

minister Yogi Adityanath aser state minister tem liasü.

Ato kilonser Varanasi nung aliba airport tonga aruba mapang nung state Angh, Anandiben Patel, CM Yogi Adityanath aser tongti ketdangsertemi pa agizüka liasü.

"UP-i coronavirus tanabuba wave junga aziüktetdar. Wara tanaben prokba mapang nung state sorkari iba wara prokba kanga junga nokdangtetogo," ta pai ashi.

Brihostibarnüsa World Youth Skills Day Programme nung jembidang Modi-i, tanü putu nung lanurtem atema skill development ya kanga tongtibang aser 'Aatmanirbhar Bharat' atema-a skill

development ya kanga tongtibang, ta metetdaksü.

"Coronavirus wara aliba mapang nung tang agi tanabenbuba iba anogomong amonger. Tang ama alima nung wara aliba ajanga tayongzükba balala aika aliba mapang World Youth Skill Day ya kanga tongtibang ta rajemogo," ta pai ashi.

"Pradhan Mantri Kaushal Vikas Yojana ajanga tang tashi nung lanur crore 1.25 dak tema nem training agütsüogo," ta Ato kilonserisa metetdaksü.

Tanü iba anogomong nung Ato kilonseri Varanasi nung International Cooperation & Convention Centre- Rudraksh semzükja liasü.

Sedition ozüng anema SC obendang pelaa agizüker: Rahul Gandhi

New Delhi, Chiteni/July 15 (Agencies): Brihostibarnü Supreme Court bench kati sedition ozüng dak sendakba nung Centre sorkar dang, India nung nuchiso ngur sülen küm 75 jungogo, ajisüaka iba ozüng ya tang tashi nungdaker asü?, ta asüngdangba sülen Congress party lenir Rahul Gandhi-i SC obendang pelaa agizükogo.

British nungeri India yimsüsüba mapang nung amshiba ozüng tang tim mesüi amshiba dak sendakba nung Chief Justice N V Ramana leniba nung Supreme Court bench kati Centre dang, British nungeri Mahatma Gandhi nunger ama lenirtem ola madokdaksütsü atema sedition ozüng ya amshia liasü; kechiba iba ozüng ya magiener?, ta asüngdang.

Supreme Court obendangji Opposition lenir aika aser lokti lenirtem aikati pelaa agizükba den külemi iba ozüng ya agientsüla, ta shiogo.

Rahul Gandhi-ia twitter ajanga, "Onoki Supreme Court obendangji pelaa agizüker," ta ashi.

IPC nung Arrla 124A (sedition) ozüng agientsü atema temepishiba ken o aika agüja liasü, aser Supreme Court bench-i item ken o angadangsü melunga liasü.

SC bench-i, "Sorkari kechiba telemtetba magirar onoki memetet. Ner sorkari ozüng taap ajak agiena arudar," ta metetdaksü.

Taoba mapang IT Minister, Arun Shourie aser NGO Common Cause-i sedition ozüng anema Suprema Court nung temepishiba ken o benoka liasü.



Patna, July 15, 2021: Bodhbarnü Bihar Chief Minister, Nitish Kumar-i anünglen nungi state nung tzümetsüng agi kongshiba tesemtem repranga asadangba noksa nung angur.

Bandaru Dattatreya-i Haryana Angh inyaksü atema tenangzükba agi

Chandigarh, July 15 (Agencies): Taoba mapang Union Minister, Bandaru Dattatreya-i Haryana Angh inyaksü atema tenangzükba agiogo; pa state nung Angh 18buba asütsü.

Brihostibarnü Raj Bhavan, Chandigarh nung Punjab & Haryana High Court Chief Justice, Ravi Shanker Jha-i ketdangsüa Dattatreya nem tenangzükba agidaksü.

Arrshi küm 74 Dattatreya ya Himachal Pradesh nung Angh inyaka liasü aser tawa Angh melentepba mapang nung pa Haryana Angh shim.

Haryana nung Satyadeo Narain Arya Angh inyaka liasü aser pai Tripura nung Angh inyaksü atema tenangzükba agiogo.

Haryana Angh tenangzükba agiba sentong nung Punjab Angh aser Union Territory of Chandigarh nunga Administrator, V P Singh Badnore, Haryana Chief Minister Manohar Lal Khattar, deputy chief minister Dushyant Chautala aser Home Minister Anil Vij nunger aden.

Kasa sentong nungjisa Angh kinüngtsü, Vasantha, jala Vijaya Laxmi aser kinüngertem aden.

Pezüben tashi MP inyaksang, Dattatreya-i mezüng 1991 küm Lok Sabha election nung takok nua liasü. Pa 1947 küm June 12 nü Hyderabad yimti nung aso aser pai Osmania University nungi BSc degree nua liasü.

2014 küm Ato kilonser, Narendra Modi-i aniba NDA sorkar nung Dattatreya ya Minister of State for Labour & Employment inyaka liasü aser iba jakdang taoba mapang Ato kilonser, Atal Bihari Vajpayee-i aniba Union Cabinet nunga liasü.

2019 küm pa Himachal Pradesh Angh shima liasü.



July 15, 2021 nü Chandigarh nung Chief Justice of Punjab & Haryana High Court, Justice Ravi Shanker Jha-i ketdangsüa Haryana Angh inyaksü atema Bandaru Dattatreya nem tenangzükba agidaksüdü tangokba noksa nung angur.

Mamata-i Delhi semdanga opposition party lenirtem ajurutsü

New Delhi, July 15 (Agencies): West Bengal Chief Minister, Mamata Banerjee-i kabi melii Delhi semdanga BJP nung madenba party balala nungi lenirtem ajurutsüa lia nisung aikati, 2024 Lok Sabha election atema BJP anema Front tasen ka tentettsüa akok, ta jembidar. Ajisüaka osangbenertem senden ka nung jembidang Mamata-ibo, "Ni medemer tejen aser tasenpur ajak ajurutsü atema Delhi semdang. Ni maongka dang ngura Ato kilonser, Narendra Modi aser Tir Ram Nath Kovind nata ajurutsü," ta metetdaksü.

July 19, 2021 nü tzungluruwa mongpu Parliament tenzüksü ana nung lir, anungji Delhi nung opposition party balala nungi lenirtem ajak yimti nung adenshia aliba mapang ka nung Trinamool Congress tongti, Mamata-i Delhi semdangsü.

Osang angazükba agi, July 25 nü la Delhi-i aotsü aser yangji anogo 5 nü amongtsü.

Taoba ita Delhi nung NCP tongti, Sharad Pawar'er kidang opposition party balala nungi lenirtem adenshia senden amenba sülen nisung aikati BJP anema Front ka tentettsü, ta jembia liasü aser tang Mamata-ia Delhi semdanga BJP nung

madenba party balala nungi lenirtem ajurutsü, aser 2024 Lok Sabha election atema BJP anema Front ka tentettsüa akok, ta aikati jembir.

Election atema asalentong yanglutsür mongin, Prashant Kishor-i tawa lenir aika den jurila senden menogo, aser parnok rongnung Sharad Pawar, Sonia Gandhi, Rahul Gandhi aser Priyanka Gandhi Vadra nunger densema lir.

TMC lenir kati, "Assembly election nung BJP tamakok ngudaksüba sülen Mamata didi kanga nungtugu kümogo. 2024 General election matongdang lai BJP anemertem aser BJP den madenba party tem nungi lenirtem ajuruner," ta metetdaksü.

Delhi semdangba mapang nung Mamata Banerjee-i Congress Tir, Sonia Gandhi, Samajwadi Party tongti lenir, Akhilesh Yadav, Delhi Chief Minister Arvind Kejriwal aser NCP tongti lenir, Sharad Pawar nunger ajurutsüa akok.

Ajisüaka laibo, "Election agiba sülen ni teti agia Delhi semdanga tejen aser tasen medemertem ajurur. Anungji tang-a anogo ishika atema ni Delhi semdangsü, kechiyong tang yangji coronavirus tensa aziüktetogo," ta metetdaksü.



China south tsütsü Guangdong Province kübok Zhuhai nung tzümetsüng agi metsüngbanger aliba tunnelka nung tzü agi metsüngzüker maotsü atema yangluba noksa nung angur. South China nung tenem tupoka lenmang yangluba (tunnel) ka tzü agi metsüngbang dang yangji inyaker nisung 14 ngutettsü meranga ketdangsürtemi Brehostibarnü tzü atsüdoktsü meranga liasü.

Pakistan border crossing tanaben rakzükogo: Afghan sorkar

Kabul, Chiteni/July 15 (Agencies): Linük south tsütsü Pakistan den arrtsü alema senzüba tesem tongtipang ka Taliban-i mapang tatsüka amokbanga aliba Afghan sepaitemi tanaben agiogo, ta Afghanistan sorkar nung ketdangsür kati ashi, saka Taliban-i iba osangji magizüker aser jila ya tang tashi par ket nung lir, ta ashir.

Taliban teloki Spin Boldak-Chaman border crossing ya Bodhbarnü agia liasü, koba Pakistan den arrtsü alema senzüba tesem tongtipangtiba jenjang tanabuba nung lir, aser Kabul nung anüolen linüki nungitba sorkar asoshi saru bendenba tesem tongtipang ka lir.

Saka Bodhbarnü ghonda ishika lir Afghan sepaitemi arrtsü nung aliba jila kübok iba tesem nung shishilempaba tesem tongtiba, customs department aser danga sorkar office tem tanaben agiogo, ta Kandahar province nung sorkar ketdangsür kati ashi, kong iba border crossing ya lir.

Civilian aser sepaitem takum samaba tajemba kumdaktsütsü mechi sorkar meyong sepaitem ya mezüngbo iba tesem nungi ainshia liasü, saka tangbo iba tesem mürektetba operations agir, ta ketdangsüri ashi.

Ajisüaka lendong tulu lir, ta pai ashi, kechiaser yangji Afghan security forces dang nungi Taliban züngsem timba lir.

Ajisüaka Taliban odongtar Zabihullah Mujahid-ibo par sepaitemi tang tashi arrtsü nung aliba post tem amokbanga lir, ta ashi. "Ibai olulu prokshiba dang lir aser Kabul administration ajanga tamendak dak mali kibur kuma jembiba dang lir," ta pai osangbener dang ashi.

Iba rara nungi jenshia aortem linüki aittsü tsübuva Pakistan-i par tsütsü arrtsü shibangogo, koba kanga mazüngi arrtsü alema senzüba tesem ka lir, aser Afghanistan nung Kandahar yimti aser Pakistan nung rongnendak tesemtem sendakteptsür.

United States-i aniba linük balala sepaitem Afghanistan yutsür aoba mapang Taliban aser sorkar meyong sepaitem tsüngta raraba tali akumer, aser Taliban teloki linük north aser west tsütsü district aser arrtsü alema senzüba tesem aser lenmang aika amokbangogo.

Tensa kanga mejungi akumba ajanga linük balalai Afghan nunger tsükchitep adoka aliba telok ana tsüngta yimjung yanglutsü atema tsüka-rongshir.

Tensa mejungi akumba ajanga Afghan refugee tebilemtsü tase adoktsü tsübuva alidang Tir Ashraf Ghani-i Uzbekistan nung anasatapa aliba linüktem nungi lenirtem den Brehostibarnü ajuruteptsü lir aser lenmang bushitsü mechi Pakistan-i Afghan lenirtem den senden amentsü, ta ashi.

Afghanistan nung India-i shilem agiba nokdangtsü mechi Pakistan-i Taliban yarir ta küm aika tai tonglokja arur, saka Pakistan-i aji magizüker.

"Hamid Karzai densema tongtipang Afghan lenirtem jaokogo," ta Pakistan indang Information Minister Fawad Chaudhry-i Twitter nung ashi. Hamid Karzai ya Afghanistan nung taoba mapang tir inyaka liasü aser tanga kanga tongtipang nübu ka lir.

Pakistan Ato Kilonser Imran Khan-i Bodhbarnü Karzai den jembio, ta Chaudhry-i ashi. Paibo iba dak alaka mashi saka

osang kar ajanga ashiba agi, iba senden nung Taliban lenirtem madentsü, kechiaser Pakistan-i parnok den balaka jembishinür.

Karzai aser Afghan yimten yimsüsür kar hopta tatemlen Qatar-i aotsü teimla lir, aser yangji Taliban züngsemtem den senden amentsü, kong Taliban indang office Doha nung lapoka lir.

Afghanistan nung Taliban-i 1996 nungi yimsü süa aru, saka US nung September 11, 2001 nung lendong atalokba sülen 2001 küm tatemlen parnok yimsüsüba menden nungi US-i aniba linük balala nungi sepaitemi atsingdoka liasü.

Iba sülen parnoki bendanger sepaitem linük nungi aridoktsü asoshi rara arur aser Kabul nung anüolen linüktemi yariba sorkar laodaktsütsü meranger.

Afghanistan nungi NATO sepaitem anizüker aoba asoshi taoba US tir, George W. Bush-i aitsü aser civilian tem ya Taliban nem tepsettsü yutsür, ta Bodhbarnü ashi.

"Afghan nung tetsür-tanurtem tepang agi meshitetba timtem ajurutsü. Taliban nem tepsetdaktsütsü yutsütsü aser ibaji ajanga kü molung raksar," ta Bush-i ashi.

Afghanistan nungi sepaitem anizüker aoba ya aibelen ka lir, ta pai ashi.

2001 küm September 11 nü New York nung aliba World Trade Center amakba sülen taoba Republican tir yagi US sepaitem Afghanistan-i yoka liasü.

Afghanistan nungi US aser NATO sepaitem ya May ita tetenzüklen ainshi tenzük aser September 11 tashinung bendanger sepaitem ajunga ainshitsü sentong lir.



Afghanistan nungi America sepaitem ainshiba mapang US mitkartem yariba Afghan nungertem asoshi sentong kar yangluang, ta US Tir, Joe Biden administration dang ajungshir. Kabul, Afghanistan nung US sorkar aser NATO anema April 30, 2021 nung longkak aitdang taoba mapang Afghan nunger oshi meyipzüksür kati banner amer nokdaka aliba noksa nung angur.

Colombia nung sen million \$185 jenjang cocaine apu

Bogota, Chiteni/July 15 (Agencies): Colombia nung ketdangsürtemi Panama aser United States nung ketdangsürtem den lungjemer sen million \$185 jenjang cocaine tuozük tonne 5.4 apu, ta Colombia navy ajanga Bodhbarnü ashi.

Kanga kera jajaba rong ka nung iba temesepba mozü bena aliba ya Panama ketdangsürtemi putetba sülen Colombia coast guard temi arshiba mapang Colombia meyong tzü nung jenoka lia apu, ta navy temi sangdong ka nung ashi.

Iba tesem nung coast guard züngsemtemi mita bushiba mapang temolunglemtsü maketba rong ka nung talep 81 ngutet aser temeket nung aliba arem nung talep 147 miima yua aliba ngutet, kong cocaine ya liasü.

"Iba ozüng alema shibelenba ya United States mesüra Europe tonga aru asübo, item linük nung doses million 16 yanglua aliba nung nüburtem temang nung kongshila," ta Colombia indang Caribbean naval task force

tanishir Rear Admiral Juan Rozo Obregon-i ashi.

Iba temesepba miim mozü ya Clan del Golfo criminal gang indang lir, ta ketdangsürtemi ashi. Iba telok ya Dairo Antonio Usuga-i anir lir, shiba dang "Otoniel" ta ajar, shiba Colombia nung temesepba miim mozü shibelener nisung tamajungtiba ta züngshir.

Küm aika temesepba miim mozü shibelenba atema raraka, Colombia ya alima nung cocaine timtiba adokdaksüba linük ka lir aser United States-i iba temesepba mozü züsenba aser yangluba anentsü rongshia arur.

Colombia security forces ajanga 2020 nung coca züsenba ali hectares 130,000 (321,000 acres) raksatsü aser cocaine tonne 505 shi pua liasü.

Clan del Golfo mesüra Gulf Clan ya Colombia nung mapa tamajung inyakba telok tulutiba ta züngshir, kong taoba mapang far-right paramilitaries nung alirtem densema lir. 2016 küm iba telok nungya züngsem 1,600 shi liasü, ta mitar ketdangsür kati January ita shia liasü.

Germany tzümetsüng nung nisung 20 asü



Europe anüolen tsütsü tzünglu kanga sashia aruba sülen Brehostibarnü Germany nung tzümetsüng tesashi adoka nisung 20 shi süogo aser aika samar bushir. Tzünglu kanga sashia aruba ajanga ayong nungboka tzümetsüng adoka nisung aliba ki bongzuka ao.

Berlin, Chiteni/July 15 (Agencies): Germany anüolen tsütsü tzümetsüng tesashi adokba sülen nisung 20 süogo aser ano timba samar bushir, ta police ajanga ashi.

Tzümetsüng tesashiba ya Rhineland-Palatinate aser North Rhine-Westphalia state nung liasü, kong ki aser garitem metsüngzüka ao.

Kidanger linük, Belgium nunga nisung ana asü aser Netherlands nunga kanga sashia kongshia lir.

Iba sülen Europe anüolen tesem aika nung otsüsüa tzünglu kanga sashia arua ayongtem mubanga liasü.

Rhineland-Palatinate state tekolakba, Malu Dreyer-ia iba tzümetsüng lendong ya tesashi liasü, ta ashi.

"Iba lendong nung nisung asüba aser samaba lir, aser ano aika lendongbang nung lir. Emergency services ketdangsür ajunga takum bendanga agütsür inyaker," ta lai ashi.

Chancellor Angela Merkel, shiba US nung Tir Joe Biden den ajuruteptsü oa lir, laia iba lendong atalokba osang

angashia aoksaba lemsatapa liasü.

Rhineland-Palatinate kübok Ahweiler district nung Ahr ayong mubangba sülen nisung 70 samar bushir.

Taolen mali lenmang ajunga shibanger aliba nüburtem yaritsü atema police indang helicopter aser sepaitem noklang aika yoka liasü. Nisung aika kilem-ma nung atatepa liasü, ta police temi ashi.

Linük anüolen tsütsü school tem shibangogo aser transport tesendaktep nunga kanga mejungi kongshia lir.

Tenem agi sünga aliba Eifel region nung Schuld bei Adenau district kübok ki 25 shi techireper lir, kong state of emergency sangdonga lir.

North Rhine-Westphalia kübok Euskirchen district nung nisung ti asüba osang lir, aser Eifel region nunga nisung pezü asü, kong nisung aliba ki bongzüker ao.

North Rhine-Westphalia nung firefighter ana Bodhbarnü asü. Tena ya ka tzü nung arakseta asü aser ka rescue operation agiba sülen lao.

Peren nung painting competition ayongzük



Peren DC den Sakhi One Stop Centre ketdangsertem aser Painting Competition nung takokertem noksa nung angur.

Peren, Chiteni/July 15, 2021 (TYO): Peren District Administration aser Sakhi One Stop Centre, Peren longjemer Brehostibarnü (15.07.2021) painting competition ayonga agiogo, ta sangdong ka ajanga metetdaksü. Iba painting competition ya "Imagining a Gender-Equal World" omen nung ajemdaker ayongzük aser DC's office chamber, Peren nung sempet agütsüba sentong agia liasü. Iba sentong nung, EAC aser Sakhi One Stop Centre, Nodal

Officer Ane Khieya menden liasü aser Deputy Commissioner, Peren, Sentiwapang Aier, NCS-i takok angurtem nem sempet agütsü. DC-i, tetsür o tebur mebandangi ajak nem kasa maangka agütsütsü asoshi pei sempet ajanga nübör dang tekümdangtsü osang sangoktsütsü aser lokti ajungkettsütsü nükjidong yur pei sempet tajungtiba nung amshitsüla ta takok angurtem ajungshia liasü.

District Administration aser Sakhi One Stop Centre, Peren longjemer ayongba painting competition nung, arishi küm 15 tain Kemchina Ndang-i mezüng jenjang nung takok angu. Kasa tetoktepba nung, Toshinara Aier (43)-i tanabuba jenjang aser Isiba (25) o Kiriahungle Hiahing (25) nati tasembuba jenjang ajangzüktem. Takok angur indang painting tem DC's Office aser Sakhi One Stop Centre, Peren nung ayutsü, ta kasa sangdong nung shia lir.

Wokha DPDB senden menogo



Wokha, Chiteni/July 15, 2021 (TYO): Brehostibarnü, DC Conference Hall, Wokha nung Wokha District Planning and Development Board (DPDB) senden agiogo. Iba senden nung, Information Technology & Communication, Science & Technology, New & Renewable Energy, Advisor, Mmhonlumo Kikon menden liasü, ta sangdong ka ajanga metetdaksü. Ita shia ayonga agiba Wokha DPDB senden nung, züngsemtemi Ralan nung Veterinary Health Centre achaayanga tenzüktsü aser Chukitong, PHC nungi CHC (Community Health centre) agi ajungkettsütsü asoshi tekolakpur dangi asalentongtem benoktsü olemtepa liasü. Iba senden nung LADP & Common Pool 2021-22

agizüktsü asoshi rangloker board-i mapang agia asadangshia jembi, koba iba mapatong sorkar dangi abentsü asoshi telok bangjemtep. Chief Medical Officer, Wokha, Dr. C.W. Tungoe-i COVID-19 tensa nung ajemdaker jembiba mapang, tanü tashi district nung Covid vaccine dose 40,780 tashi agizükogo aser item rongnung dose 36,680 tashi agütsüogo, ta ashi; aser district nung Covid vaccine dose 4,100 shi anünga lir, ta pai shisem. Tungoe-isa, July 14, 2021 tashi nung Cold Chain Point COVID-19 vaccine stock ajak indang jenjang metetdaksü, kong district ajunga nung vaccine maparen kara aotsü atema Cold Chain Point 11 tashi achaayangdar, ta pai ashi. Maneni, Wokha district nung

Covid-19 tensa dak sendakba nung jembiba mapang, Mmhonlumo Kikon-i, district nung COVID-19 wara prokba azioktsü nükjidong nung, health care system indang kisü-jensü maparen aser tanga facility achaayangtsü asoshi 2021-22 atema LADP fund nungi shilem 10% agizüka amshio, ta telok dang metetdaksü. Pai, Covid-19 tendangba maparen ulushitsütsü aser vaccination drive karadaksütsüsa meranga inyaksü asoshi Wokha district Task Force ajungmesogo aser vaccine agiba indang tajangzüktem nung nübör dang tekümdangtsü osang sangoktsütsü asoshi arogo aser tanga tongtibang tentetem den longjemer inyaksü asoshi Task Force ayongzükta liasü, ta kasa sangdong ajanga metetdaksü.

TSÜNGREM TENÜNG SANGA PELABA SANGDONGER

Dr. Chuba Imsong & Mrs. Yashipokla na jala Dr. C. Nukshilemli Psychology faculty of Arts & Humanities nung Doctor of Philosophy, thesis title "A Comparative study on the psychological factors & motivation levels that influence job satisfaction of post graduate teachers in government and private schools in Nagaland" Kalinga University, Raipur nungi Dr. Anil Kumar lenisüba kübok takok anguba atema Yimsongunger Kidong-i tenüngsang agütsür.



Nai iba jenjang ajangzüktemba atema onok nema adanger aser tarutsü nunga ne wadang nübörtem asoshi temoatsüba südakjang ta Ungma Yimlang Yimsongunger kidong-i sarasademtsür.

Sd/-

Yimsongunger Kidong
Ungma Yimlang

REGIONAL INSTITUTE OF EDUCATION, BHUBANESWAR
(राष्ट्रीय शैक्षिक अनुसंधान और प्रशिक्षण परिषद्)
(National Council of Educational Research & Training)
Sachivalaya Marg, Bhubaneswar-751022

ADMISSION NOTICE 2021-22

Advt. No: 402 Dated: 09.07.2021
Online applications are invited for admission to **M.Phil in Education** course offered by Regional Institute of Education, Bhubaneswar for the session **2021-2022**. For details regarding Eligibility Criteria, Mode of Selection, Determination of Home State, Reservation, Fees Structure, Entrance Test etc., please visit our website **www.riebbs.ac.in**.
PRINCIPAL

Tripura nung yakta Cabinet menden melenshitsü akok Agartala, Chiteni/July 15 (Agencies): Tripura nung menden lemzüktsütsü imlar. yakta cabinet menden Tripura Cabinet nung tang melenshitsü akok. BJP-i aniba menden tazüng ana alibabo party-i sorkar kümtetba sülen kechi südir süaka küm asem lir Tripura Cabinet sündgaksütsü. menden melenshitsü imlar. Maneni tang Assembly Speaker ya MLA Ratan Chakraborty-i melentsü imlar. Kasa mapang nung Tripura Speaker ya MLA Ratan Chakraborty-i melentsü imlar. BJP legislators tem rongnung party anema nokdaker kar nem cabinet menden agütsütsü akok. den sensak asemtsü asoshi New Parnok temulung südaktsütsü Delhi nung oa lir. nükjidong nung iba jenjang agütsü State nung BJP MLA kar imlaa atar.

Peshu Nyukya nung vaccine agütsüjemogo



Noklak, Chiteni/July 15, 2021 (TYO): Noklak district aser iba District Administration telungtet nung temsüa alir tem Medical Department ajanga noklang shilem ayimjema Peshu Nyukya nung vaccination drive ayongzük. vaccine agütsüba yimtsüng Tiyazü aser olulu osangtem rongnung Thonoknyu sub-division kübok Peshu Nyukya ajanga vaccine dak sendakba yimtsüng mezüng kümogo, ta nung nübörtem tebilemstü sangdong ka ajanga adokba aser ratamata aliba metetdaksü. mapang ka nung, Peshu Nyukya Brehostibarnü (15.07.2021), yimtsüng nung temsüa alir iba yimtsüng nung temsüa alir noklang shilem vaccine arishi küm 18 nungi temapur ayimjema agiba ajanga tanga ajak nem ayimjema Covid temeküt yimtsüng tem atema vaccine agütsü liasü. tatishitsü tuluka asütsü, ta kasa District Task Force, Noklak- sangdong nung shia lir.



GOVERNMENT OF NAGALAND
DIRECTORATE OF INFORMATION TECHNOLOGY AND COMMUNICATION
(Below Nagaland Secretariat) Thizama Road
Nagaland : Kohima 797001

No.DIT&C/Gen-46/2017(Pt-II)

Dated 12th July 2021

NOTICE INVITING e-TENDER

The Directorate of Information Technology & Communication, Government of Nagaland invites proposals from IT empanelled Firms under the Department of IT&C for Supply of IT Equipments.

The detailed tender documents can be viewed / downloaded from the following websites, from 13/07/2021 to 27/07/2021, 14:00 Hours (Server Time):

1. www.nagalandtenders.gov.in
2. www.nagaland.gov.in

Amendments/Corrigendum, if any will be hosted on the above website.

Sd/-

(Er. Tongtiliba Longkumer)
Director.

Paris Saint-Germain nung Donnarumma denogo



Gianluigi Donnarumma

New Delhi, Chiteni/July 15, 2021 (Agencies): Italy football team indang goalkeeper Gianluigi Donnarumma, shibai England den Euro 2020 final nung penalty metsütepang goal ana tashi nokdangteta asaya, Bodhbarnü Paris Saint-Germain den küm pungo tashi asayatsü atema contract agizükogo.

Iba final asaya nung Italy-i England madak takok ngur sülen, 'Euro 2020 Player of the Tournament' award takok angusang, Donnarumma-i Serie A indang taoba season nung junga shilem agiba ajanga Milan-i tanabuba jenjang tongtet. 2013-14 season nungi AC Milan-i tesüsa tembangba season nung Champions League atema mezüing qualify süogo.

Serie A nung season trok tashi asaya aruba mapang, arishi küm 22 tain Donnarumma-i league asaya 215 nung shilem agiogo. Ano külen, pa arishi küm 17 ser anogo 189 alidang, Italian national football team putiotsü nung pa goalkeeper tanubusang

aküm. 2016 küm September ita France aser Italy asayaba mapang, pai iba alizüing tongtet.

PSG-i ashiba agi, 2026 küm June ita tashi asayatsü atema Donnarumma-i tenangzüktep agiogo.

"Iba club nung adentsü maongka anguba atema pelar. Tayongzükba tasen agizüktsü asoshi renema lir ama bilemer aser iba club nung dena maneni tajangshiba tasen aika angutsü imla atar. Paris (PSG) den asaya takok timba angutsü aser iba Club sapurtem peladaktütsü asoshi ni inyakner," ta Donnarumma-i ashi.

Bodhbarnü, Donnarumma-i Instagram sabang nung Milan fans atema osang ka lemsatop.

"Iba club nung dener mezüing anogo nungi tatem tashi Rossoneri (AC Milan) nung ajurur ajak kü mulung nung teti alitsü. Iba shilem ni atema kanga dang tongtibang asütsü, kechiyong iba club ajanga tanü ni iba jenjang nung nokdakteta lir," ta pai ashi.

"Tarutsü nunga Milan pur maneni takok nguyonga aotsüsa

kü mulung taroktiba nungi imlaa atar. Ni tainlonglong asüba mapang, Milan nung asaya tenzük aser küm 8 tashi iba jersey semer team atema nümatanga asayaogo. Arishi küm 16 alidang, Serie A nung ajemoka Rossoneri tenüing nungi asayadang, ni tongtibang alizüing balala tongtetogo. Küm aika ni tajangshiba tasen aika nguogo aser itemji kodanga mamatetsü," ta Donnarumma-i ashi.

Paris Saint-Germain nung goalkeeper jenjang atema Donnarumma-i asayar takotet Keylor Navas den külemi toktepa asayatsü.

Maneni, PSG-i 'free transfer' nung defender Sergio Ramos anisemogo. Spain nung club tetsüti Real Madrid nung Ramos-i küm 16 tashi asayar sülen, pai PSG nung adener asütsü. Kasa mapang, Italian champions Inter Milan nungi right back asayar Achraf Hakimi-a PSG nung denogo. PSG-isa free transfer' nung Liverpool nungi Dutch midfielder Georginio Wijnaldum aniokogo.

Olympics lapokba sentong nung tongtipang nisungtem bulua mangutsü



New Delhi, Chiteni/July 15, 2021 (Agencies): July 23, 2021 nü Tokyo Olympics lapoba sentong nung tongtibang nisung (VIPs) 1000 dang nungi tajemba adentsü akok. Mezüingbo, VIPs 10,000 melatsü renem, saka Covid-19 tensa mejungi küma aoba asadangteta nisung 1000 dang nungi tajemba kümtsür asütsü.

Tokyo nung state of

emergency mapang, iba Games tenzüktsü, koba asayamung piyong iba state of emergency alitsü.

Japan indang Kyodo News sangdong ajanga angazükba agi, July 23, 2021 nü National Stadium nung Olympics lapokba sentong nung adener shilem tajemba kümtsütsü asoshi asayamung ayongertemi asalentong yanglua arudar.

Iba asayamung lapoka sentong nung Japan indang Emperor Naruhito aruagi adentsüsa asalentongtem yangludat. Kasa mapang, iba sentong nung bendanglen nungi jaoker rongnung US first lady Jill Biden-a aruagi adentsü asoshi imlar.

Bodhbarnü, Tokyo nung nisung 1,149 dak coronavirus tashidak tasen putet, koba ita trok nung iba anogo nisung

timtiba dak iba tesashi wara puteter asütsü. January 22, 2021 nungi Tokyo nung Covid-19 tashidak timtiba putetba rongnung Bodhbarnü anogo ya asütsü. Tang, state of emergency tasenba kübok, Tokyo telungtet nung lapoka aliba restaurant aser bar tem nung yi mamshitsü asoshi tetuyuba agütsüogo.

Tesüiba anogo ishika tejakdang, Japan nung Brazil Olympic team anenzükba hotel ka nung telok ka dak coronavirus tashidak putetba osang angazükogo. Ketdangsur kati ashiba agi, Tokyo kübok Hamamatsu indang hotel ka nung inyaker nisung tenet dak coronavirus tashidak putet. Ajisüaka, Brazil team pur iba hotel nung bubble telungtet nung alir asünung, parnok shinga dak iba tashidak meputet.

Rishabh sülen staff ka dak Covid-19 putet

New Delhi, Chiteni/July 15, 2021 (Agencies): England nung, India cricket team indang wicketkeeper-batsman Rishabh Pant dak coronavirus positive putet, ta Brehostibarnü sangdong ka ajanga metetdaksü.

Rishabh dak iba tashidak puteter sülen, Indian cricket team indang specialist Dayanand Garani-a Covid-19 positive puteta liasü. Kasa anogo Garani dak iba tashidak aliba osang angazük aser pa den ajuriteper - India squad aser coaching staff züngsem ajak quarantine süogo.

Tang, UK nung India team nungi züngsem asem - Bowling coach Bharath Arun, reserve wicketkeeper Wriddhiman Saha aser India indang standby opener Abhimanyu Easwaran nunger quarantine' südar. Par asempronlga dak iba tashidak meputet, saka UK Sorkar indang Health Safety Protocol nung anidaka par asem quarantine asütsüla, ta sangdong nung shia lir.

Tesüiba anogo 8 tejakdang, Pant-i Covid-19 atema tendang aser Brehostibarnü positive putetba dak alaka pa temang nung iba tashidak temaitüsü agi shirangba mali. England team den asaya pungo Test series tenzüktsü lia practice atema Rishabh, Garani, Arun, Saha aser Easwaran nunger tanüingba squad den külemi Durham-i maotsü.

Pant, shibai May 13 nü Covid vaccine mezüing dose

agiogo, tawa London kübok Wembley Stadium nung England aser Germany tsüingda Euro 2020 asayaba mapang, pai par medemer den külemi iba asaya repranga liasü.

Southampton nung World Test Championship final temer sülen, India team nem anogo 20 sodi agütsü.

Board of Control for Cricket in India (BCCI) vice president, Rajiv Shukla-i ashiba agi, iba virus ajanga tanga asayartem mekongshi.

Taoba mapang India cricketer Suresh Raina aser off-spinner takotet Harbhajan Singh nati social media sabang ajanga, iba tashidak nungi Pant yakta taneptsü angutsü asoshi osang lemsatopogo.

"Asayar ka dak Covid-19 positive putet, saka tesüiba anogo 8 nungi pa quarantine' südar. Pai tanga hotel nung külem team nungi asayar shinga dena külemi munga meliasü, ajiasünung tanga asayar shinga dak iba wara memena," ta Rajiv Shukla-i ashi.

England team den aruya aliba Test series - asaya pungo atema renemshiba shilem ama, India team-i Durham den asayatsü sentong renemdar. Iba practice game ya July 20, 2021 nungi tenzüktsü.

Maneni, taruba ita nungi England aser India na tsüingda Test series asaya tenzüktsü terenemba lir, koba World Test Championship indang shilem tanabuba tetenzükter asütsü.

Tokyo Olympics nung Angelique Kerber masayatsü

New Delhi, Chiteni/July 15, 2021 (Agencies): Olympic medal takok angur Angelique Kerber-i Tokyo Games nung shilem magitsü lemtet, koba July 23 nungi August 8, 2021 tashi asayatsü aliba Olympics nungi tukadoker tennis asayar rongnung la tesübuba asütsü. Brehostibarnü, Germany tsür Kerber-i ashiba agi, tesüiba hopta ishika nungi Tour nung kanga anibelemogo.

Grand Slam asemnen tashi takok angur, Kerber-i 2016 Rio Games tennis asayamung tetsür kija asaya nung silver medal takok angu.

Arishi küm 33 tain Kerber-i 'grasscourt season' nung mazüing shilem agiogo. Taoba ita, lai asayamung asem tashi nung shilem agia Bad Homburg nung takok angu aser Wimbledon nunga semi-final tongteta asayaogo.

"London 2012 aser Rio 2016 Olympics nung Germany tenüing nungi shilem agitsü maongka ngua külem team pur den jangratema asayaogo. Tennis asaya arur külen nungi ni sapuba asayamung rongnung Olympics ana ya asütsü aser kü mulung nung teti alitsü," ta Kerber-i ashi.

"Hopta ishika anibeleva asaya arur sülen, temang nung tashi ajema aoba ajanga anisüngzüktsüsa akümer aser khen bilemdangtsübo kanga dang tezüdangtsüka lir. Taruba tennis asayamung nung shilem magidang, mapang agia anisüngzükba aser temang anepalutsüla," ta lai ashi.

"Nenoki metetimi nungita yaria aruba atema kanga dang pelar. Iba telemtetba (Olympics nung masayatsü) agitsü kanga tasak liasü. Tokyo asayamung nung shilem agitsüpur külem Germany nunger athlete ajak dang tajungtiba nung shilem agitsü asoshi ajungshir aser takok tulu angutsü imlaa atar. Nenok ajak kanga dang menungratsü," ta Kerber-i shisem.

Roger Federer, Rafa Nadal, Dominic Thiem, Serena Williams, Simona Halep aser Bianca Andreescu densema nüngtugu tennis asayar kari aruya aliba Olympics nung shilem magitsü osang jangjatsüogo.

Britain indang top seed - Dan Evans aser Johanna Konta naprongla dak COVID-19 puteba sülen tenati iba asayamung nung masayatsü osang sangoktsüogo.

BILEMDANGANG

"Takümüji azükaru aser temoatsü nung dangbo teti malir."